

લઘુ ક્ષેત્રસમાસ

વીરં જયસેહરપય-પદ્મિટ્ઠાં પદ્મિટ્ઠિણ સુગુરું ચ;
 મંદુ ત્તિ સસરણટ્ટઠા, ખિત્તિવિઆરાડણુ-મુંછામિ. ૧
 તિરિએગરજ્જુખિત્તે, અસંખદીવોદહીઉ તે સવ્વે;
 ઉદ્ધારપલિઅપણવીસ, કોડાકોડીસમયતુલ્લા. ૨
 કુરુસગદિણાવિ-અંગુલ, રોમે સગવાર વિહિઅઅડખંડે;
 બાવન્નસયં સહસા, સગનઉઈ વીસલકખાણુ. ૩
 તે થુલા પલ્લે વિ હુ, સંખિજ્જા યેવ હુંતિ સવ્વેડવિ;
 તે ઇક્કિક્ક અસંખે, સુહુમે ખંડે પકખ્પેહ. ૪
 સુહુમાણુ-નિચિઅ-ઉસ્સેહંગુલ-ચઉકોસ પલ્લિ-ઘણવટ્ટે;
 પઇસમય-મણુગ્ગહ, નિટ્ઠિઅમ્મિ ઉદ્ધારપલિઉ ત્તિ. ૫
 પઢમો જંબૂ બીઓ, ધાયઇસંડો અ પુકખરો તઇઓ;
 વારુણિવરો ચઉત્થો, ખીરવરો પંચમો દીવો. ૬
 ઘયવરદીવો છટ્ટો, ઇકખુરસો સત્તમો અ અટ્ટમઓ;
 નંદીસરો અ અરુણો, નવમો ઇચ્ચાઇઅસંખિજ્જા. ૭
 સુપસત્થવત્થુનામા, તિપડોઆરા તહાડરુણાઇઆ;
 ઇગનામેડવિ અસંખા જાવ ય સુરાવભાસ ત્તિ. ૮
 તત્તો દેવે નાગે, જકખે ભૂએ સયંભુરમણે અ;
 એએ પંચ વિ દીવા, ઇગેગનામા મુણેઅવ્વા. ૯
 પઢમે લવણો બીએ, કાલોદહિ સેસએસુ સવ્વેસુ;
 દીવસમ નામયા જા, સયંભુરમણોદહી ચરમો. ૧૦
 બીઓ તઇઓ ચરમો, ઉદ્દગરસા પઢમ ચઉત્થ પંચમગા;
 છટ્ટોવિ સનામરસા, ઇકખુરસા સેસજલનિહિણો. ૧૧
 જંબુદીવ પમાણં, ગુલ-જોઅણ-લકખ-વટ્ટ-વિકખંભો;
 લવણાઇઆ સેસા, વલયાત્મા દુગુણદુગુણા ય. ૧૨
 વયરામઇહિં નિઅનિઅ, દીવોદહિ મજ્જગણિઅ મૂલાહિં;
 અટ્ટદુચ્ચાહિં બારસ, ચઉમૂલેઉવરિ રુંદાહિં. ૧૩
 વિત્થાર-દુગ-વિસેસો, ઉસ્સેહ વિભત્તખઓ ચઓ હોઇ;
 ઇઅ ચૂલાગિરિકૂડાઇ, તુલ્લવિકખંભકરણાહિં. ૧૪
 ગાઉદુગુચ્ચાઇ તયટ્ટ-ભાગરૂંદાઇ પઉમવેઇએ;
 દેસૂણા દુજોઅણ વર વણાઇ, પરિમંડિઅ સિરાહિં. ૧૫
 વેઇસમેણ મહયા, ગવકખકડએણ સંપરિત્તાહિં;
 અટ્ટારસૂણચઉભત્ત, પરિહિદારંતરાહિં ચ. ૧૬
 અટ્ટદુચ્ચ-ચઉસુવિત્થર, દુપાસ-સક્કોસ-કુરુદારાહિં;
 પુવ્વાઇ-મહરૂંદેઅ-દેવ, દાર-વિજયાઇનામાહિં. ૧૭
 નાણામણિમય દેહલિ-કવાડ પરિઘાઇ-દાર-સોહાહિં;
 જગઇહિં તે સવ્વે, દીવોદહિણો પરિક્ખિત્તા. ૧૮
 વરતિણ તોરણ-જ્જય, છત્ત-વાવિ-પાસાયસેલ-સિલવટ્ટે;
 વેઇવણે વરમંડવ-ગિહાસણેસું રમંતિ સુરા. ૧૯
 ઇહ અહિગારો જેસિં, સુરાણ દેવીણ તાણમુપ્પત્તી;
 નિઅદીવોદહિનામે, અસંખ ઇમે સનયરીસુ. ૨૦
 જંબુદીવો ઇહિં કુલ-ગિરિહિં સત્તહિં તહેવ વાસેહિં;

પુવ્વાવર-દીહેહિં, પરિછિન્નો તે ઇમે કમસો. ૨૧
 હિમવંસિહરી મહહિમવ-રુષ્પિ-નિસઢો અ ણીલવંતો અ;
 બાહિરઓ દુદુ ગિરિણો, ઉભઓ વિ સવેઈઆ સવ્વે.૨૨
 ભરહેરવય ત્તિ દુગં, દુગં ચ હેમવય-રણ્ણવયરૂવં;
 હરિવાસ-રમ્મય-દુગં, મજ્જિ વિદેહુત્તિ સગવાસા.૨૩
 દો દીહા ચઉ વટ્ટા, વેઅરૂઢા ખિત્તછક્કમજ્જમ્મિ;
 મેરૂ વિદેહમજ્જે, પમાણમિત્તો કુલગિરીણં. ૨૪
 ઇગ દો ચઉ સય ઉચ્ચા, કણગમયા કણગરાયયા કમસો;
 તવણિજ્જ-સુવેરુલિઆ, બહિ મજ્જ-બ્બિંતરા દો દો.
 દુગ અડ દુત્તિસ અંકા, લક્ખગુણા કમેણ નઉઅસયભઈઆ;
 મૂલોવરિ સમરૂવં, વિત્થારં બિંતિ જુઅલતિગે. ૨૬
 બાવન્ન-હિઓ સહસો, બારકલા બાહિરાણ વિત્થારો;
 મજ્જિમગાણ દસુત્તર-બાયાલસયા દસકલા ય. ૨૭
 અબ્બિંતરાણ દુકલા, સોલસહસ્સ-ડસયા સબાયાલા
 ચઉચ્ચત્તસહસ દો સય, દસુત્તરા દસકલા સવ્વે. ૨૮
 ઇગ ચઉ સોલસ અંકા, પુવ્વુત્તવિહીઈ ખિત્તજુઅલતિગે;
 વિત્થારં બિંતિ તહા, ચઉસટ્ઠિંકો વિદેહસ્સ. ૨૯
 પંચસયા છવ્વીસા, છચ્ચ કલા ખિત્તપઢમજુઅલમ્મિ;
 બીએ ઇગવીસસયા, પણુત્તરા પંચ ય કલા ય. ૩૦
 ચુલસીસય ઇગવીસા, ઇક્કલા તઈઅગે વિદેહિ પુણો;
 તિત્તીસસહસ છસય, ચુલસીઆ તહ કલા ચઉરો.૩૧
 પણપન્નસહસ સગસય, ગુણનઉઆ નવકલા સયલવાસા;
 ગિરિખિત્તં કસમાસે, જોઅણલક્ખં હવઈ પુણં. ૩૨
 પન્નાસસુદ્ધ બાહિરખિત્તે, દલિઅમ્મિ દુસય અડત્તિસા;
 તિન્નિ ય કલા ય એસો, ખંડચઉક્કસ્સ વિક્ખંભો. ૩૩
 ગિરિઉવરિ સવેઈદહા, ગિરિ-ઉચ્ચતાઉ દસગુણા દીહા;
 દીહત્ત-અદ્ધરંદા, સવ્વે દસજોઅણુવ્વેહા. ૩૪
 બહિ પઉમપુંડરીયા, મજ્જે તે ચેવ હુંતિ મહપુવ્વા;
 તેગચ્છિ-કેસરીઆ, અબ્બિંતરિઆ કમેણેસું. ૩૫
 સિરિલચ્છી હિરિબુદ્ધિ, ધીકિત્તી નામિયાઉ દેવીઓ;
 ભવણવઈઓ પલિઓ-વમાઉ વરકમલનિલયાઓ.૩૬
 જલુવરિ કોસદુગુચ્ચં, દહવિત્થરપણસયંસવિત્થારં;
 બાહલ્લ વિત્થરદ્ધં, કમલં દેવીણ મૂલિલ્લં. ૩૭
 મૂલે કંદે નાલે, તં વયરા-રિટ્ઠ વેરુલિઅરૂવં;
 જંબુણયમજ્જ તવણિજ્જ-બહિઅદ્ધલં રત્તકેસરિઅં.૩૮
 કમલદ્ધપાયપિહુલુચ્ચ, કણગમયકણિણ ગોવરિં ભવણં;
 અદ્ધેગકોસ-પિહુદીહ, ચઉદસય-ચાલ ઘણુ હુચ્ચં. ૩૯
 પચ્છિમદ્ધિસિ વિણુ ઘણુપણસય ઉચ્ચ ઢાઈજ્જસયપિહુપવેસં;
 દારતિગં ઇહ ભવણે, મજ્જે દહદેવિસયણિજ્જં. ૪૦
 તં મૂલકમલદ્ધપ્પમાણ-કમલાણ અડહિઅ-સએણં;
 પરિખિત્તં તબ્ભવણેસુ, ભૂસણાઈણિ દેવીણં. ૪૧
 મૂલપઉમાઉ પુવ્વિં, મહયરિયાણં ચઉણહ ચઉપઉમા;
 અવરાઈ સત્તપઉમા, અણિઆહિવઈણ સત્તણહં. ૪૨

વાયવ્યાઇસુ તિસુ સુરિ, સામન્નસુરાણ ચઉસહસપઉમા;
 અટૂઠ દસ બાર સહસા, અગ્ગેઆઇસુ તિપરિસાણં.૪૩
 ઇઅ બીઅપરિક્ખેવો, તઇઅ ચઉસુ વિ દ્વિસાસુ દેવીણં;
 ચઉ ચઉ પઉમસહસ્સા, સોલસસહસ્સાડડયરકખાણં.૪૪
 અભિઓગાઇ તિવલઅ, દુતીસ-ચત્તા-ડયાલ-લકખાઇં;
 ઇગકોડિ વીસલકખા, સડ્ઢા વીસં સયં સવ્વે. ૪૫
 પુવ્વાવરમેરુમુહં, દુસુ દારતિગં પિ સદ્ધિસિ દહમાણા;
 અસિઇભાગપમાણં, સતોરણં નિગ્ગયનઈઅં. ૪૬
 જામુત્તરદારદુગં, સેસેસુ દહેસુ તાણ મેરુમુહા;
 સદ્ધિસિ દહાસિઅભાગા, તયદ્ધમાણા ય બાહિરિયા.૪૭
 ગંગા સિંધુ રત્તા, રત્તવઈ બાહિરં નઇચઉક્કં;
 બહિદહપુવ્વાવરદાર-વિત્થરં વલઇ ગિરિસિહરે. ૪૮
 પંચસય ગંતુ નિઅગા-વત્તણકૂડાઉ બહિમુહં વલઇ;
 પણસયતેવીસેહિં, સાહિઅતિકલાહિં સિહરાઓ. ૪૯
 નિવડઇ મગરમુહોવમ, વયરામય-જિભ્મિઆઇ વયરતલે;
 નિઅગે નિવાયકુંડે, મુત્તાવલિસમખ્પવાહેણ. ૫૦
 દહદારવિત્થરાઓ, વિત્થરપન્નાસભાગ જડાઓ;
 જકુત્તાઓ ચઉગુણ દીહાઓ સવ્વજિભ્મીઓ. ૫૧
 કુંડંતો અડજોઅણપિહુલો, જલઉવરિ કોસદુગમુચ્ચો;
 વેઇજુઓ નઇદેવી-દીવો દહદેવિસમભવણો. ૫૨
 જોઅણસદ્ધિપિહુત્તા, સવાયઇપ્પિહુલ વેઇતિદુવારા;
 એએ દસુંડ કુંડા, એવં અન્ને વિ નવરં તે. ૫૩
 એસિં વિત્થારતિગં, પડુચ્ચસમ-દુગુણ-ચઉગુણ ટૂઠગુણા;
 ચઉસદ્ધિ સોલ-ચઉ-દો, કુંડા સવ્વેવિ ઇહ નવઇ.૫૪
 એઅં ચ નઇચઉક્કં, કુંડાઓ બહિદુવારપરિવૂઠં;
 સગસહસ નઇસમેઅં, વેઅડ્ઢગિરિં પિ ભિંદેઇ. ૫૫
 તત્તો બાહિરખિત્તદ્ધ-મજ્જાઓ વલઇ પુવ્વઅવરમુહં;
 નઇસત્તસહસસહિઅં, જગઇતલેણં ઉદ્ધહિમેઇ. ૫૬
 ધુરિ કુંડદુવાર સમા, પજ્જંતે દસગુણા ય પિહુલતે;
 સવ્વત્થ મહનઈઓ, વિત્થરપન્નાસભાગુંડા. ૫૭
 પણખિત્તમહનઇઓ, સદારદ્ધિસિ દહવિસુદ્ધગિરિઅદ્ધં;
 ગંતૂણ સજિભ્મીહિં નિઅનિઅકુંડેસુ નિવડંતિ. ૫૮
 નિઅ જિભ્મિઅ પિહુલત્તા, પણવીસંસેણ મુત્તમજ્જાગિરિં;
 જામમુહા પુવ્વુદ્ધિં, ઇઅરા અવરોઅહિમુવિતિ. ૫૯
 હેમવઇ રોહિઅંસા, રોહિઆ ગંગદુગુણપરિવારા;
 એરણણવએ સુવણણ રૂપ્પકૂલાઓ તાણ સમા. ૬૦
 હરિવાસે હરિકંતા, હરિસલિલા ગંગચઉગુણનઇઆ;
 એસિં સમા રમ્મયએ, નરકંતા નારિકંતા ય. ૬૧
 સીઓઆ સીઆઓ મહાવિદેહમ્મિ તાસુ પત્તેયં;
 નિવડઇ પણલકખ-દુતીસસહસ અડતીસ નઇસલિલં.૬૨
 કુરુનઇ ચુલસી સહસા, ઇચ્ચેવંતરનઇઓ પઇવિજયં;
 દો દો મહાનઇઓ, ચઉદસહસ્સા ઉ પત્તેયં. ૬૩
 અડસયરિ મહનઇઓ, બારસ અંતરનઇઉ સેસાઓ;

University.org

સુખમય ભવતુ

પરિઅરનઇ ચઉદસ-લકખા છપ્પન્નસહસા ય. ૬૪
 એગારડ નવકૂડા, કુલગિરિજુઅલત્તિગે વિ પત્તેઅં;
 ઇઇ છપ્પન્ના ચઉ ચઉ, વકખારેસુ ત્તિ ચઉસટ્ઠી. ૬૫
 સોમણસિ ગંધમાયણિ સગ સગ વિજ્જુપ્પભિ માલવંતિ પુણો;
 અટ્ઠટ્ઠ સયલ તીસં, અડ નંદણિ અટ્ઠ કરિકૂડા. ૬૬
 ઇઅ પણસયઉચ્ચ ઇણસટ્ઠિ-સય કુડા તેસુ દીહરગિરીણં;
 પુવ્વનઇ મેરુદ્ધિસિ, અંતસિદ્ધકૂડસુ જિણભવણા. ૬૭
 તે સિરિગિહાઓ દોસય ગુણપ્પમાણા તહેવ તિદ્ધવારા;
 નવરં અડવીસાહિઅ સયગુણ દારપ્પમાણમિહ. ૬૮
 પણવીસં કોસસયં સમચઉરસવિત્થડા દુગુણમુચ્ચા;
 પાસાયા કૂડેસુ, પણસયઉચ્ચેસુ સેસેસુ. ૬૯
 બલહરિસહહરિકૂડા, નંદણવણિ માલવંતિ વિજ્જુપભે;
 ઇસાણુત્તરદાહિણ-દિસાસુ સહસુચ્ચ કણગમયા. ૭૦
 વેઅડ્ઢેસુ વિ નવ નવ, કૂડા પણવીસ કોસઉચ્ચા તે;
 સવ્વે તિસય ઇડુત્તર, એસુ વિ પુવ્વંતિ જિણકૂડા. ૭૧
 તાણુવરિ ચેઇહરા, દહદેવીભવણતુલ્લપરિમાણા;
 સેસેસુ અ પાસાયા, અદ્દેગકોસં પિહુચ્ચત્તે. ૭૨
 ગિરિકરિકૂડા ઉચ્ચત્તણાઓ, સમ-અદ્દ-મૂલુવરિરુંદા;
 રચણમયા નવરિવિઅડ્ઢ, મજ્જિમા તિતિ કણગરૂવા. ૭૩
 જંબૂણાયરચમયા, જગઇસમા જંબુસામલીકૂડા;
 અટ્ઠટ્ઠ તેસુ દહદેવિ-ગિહસમા ચારુચેઇહરા. ૭૪
 તેસિં સમોસહકૂડા, ચઉતીસં ચુલ્લકુંડ જુઅલંતો;
 જંબૂણએસુ તેસુ અ, વેઅડ્ઢેસું વ પાસાયા. ૭૫
 પંચસએ પણવીસે, કૂડા સવ્વે વિ જંબૂદ્દીવમ્મિ;
 તે પત્તેઅં વરવણજુઆહિ વેઇહિ પરિક્ખિત્તા. ૭૬
 ઇસયરિ કૂડેસુ તહા, ચૂલા ચઉવણ-તરૂસુ જિણભવણા;
 ભણિયા જંબૂદ્દીવે, સદેવયા સેસઠાણેસુ. ૭૭
 કરિકૂડ-કુંડ-નઇ-દહ, કુરુ-કંચણ-યમલ-સમવિઅડ્ઢેસુ;
 જિણભવણવિસંવાઓ, જો તં જાણંતિ ગીઅત્થા. ૭૮
 પુવ્વાવરજલહિંતા, દસુચ્ચદસપિહુલ મેહલચઉક્કા;
 પણવીસુચ્ચા પન્નાસ-તીસ-દસ-જોઅણ-પિહુત્તા. ૭૯
 વેઇહિં પરિક્ખિત્તા, સખયરપુર-પન્ન-સટ્ઠિ-સેણિદ્ધગા;
 સદ્ધિસિંદ્ધ-લોગપાલો-વભોગિ ઉવરિલ્લ-મેહલયા. ૮૦
 દુદ્ધ ખંડવિહિઅ-ભરહે, રવયા દુદ્ધ-ગુરુગુહાય રુપ્પમયા;
 દો દીહા વેઅડ્ઢા, તહા દુતીસં ચ વિજએસુ. ૮૧
 નવરં તે વિજયંતા, સખયર-પણપન્નપુર-દુસેણીઆ;
 એવં ખયરપુરાઇં, સગતીસસયાઇં ચાલાઇં. ૮૨
 ગિરિવિત્થરદીહાઓ, અડુચ્ચ ચઉ પિહુપવેસદારાઓ;
 બારસપિહુલાઉ અડુ-ચ્ચયાઉ વેઅડ્ઢદુગુહાઓ. ૮૩
 તમ્મજ્જા રૂજોઅણ, અંતરાઉ તિ તિ વિત્થરાઉ દુનઇઓ;
 ઉમ્મગ્ગ નિમગાઓ, કડગાઉ મહાનઇગયાઓ. ૮૪
 ઇહ પઇભિત્તિ ગુણવન્ન, મંડલે લિહઈ ચક્કિ દુ દુસમુહે;
 પણસયધણુહપમાણે, બારેગડજોઅણુજ્જોએ. ૮૫

સા તમિસગુહા જીએ, ચક્કી પવિસેઇ મજ્જખંડંતો;
 ઉસહં અંકિઅ સો જીએ, વલઇ સા ખંડગપવાયા.૮૬
 કયમાલ નટ્ટમાલય-સુરાઉ વદ્ધઇનિબદ્ધસલિલાઓ;
 જા ચક્કી તા ચિટ્ટંતિ, તાઓ ઉઘડિયદારાઓ. ૮૭
 બહિખંડંતો બારસદીહા નવવિત્થડા અઉજ્જપુરી;
 સા લવણા વેઅડ્ઢા, ચઉદ્-હિઅસયં ચિગારકલા.૮૮
 ચક્કિવસનઇપવેસે, તિત્થદુગં માગહો પત્તાસો અ;
 તાણંતો વરદામો, ઇહ સવ્વે બિહુત્તરસયં તિ. ૮૯
 ભરહેરવએ ઇઇઅર-મયાવસપ્પિણિ-ઉસપ્પિણીરૂવં;
 પરિભમઇ કાલચક્કં, દુવાલસારં સયા વિ કમા. ૯૦
 સુસમસુસમા ય સુસમા, સુસમદુસમા ય દુસમસુસમા ય;
 દુસમા ય દુસમદુસમા, કમુક્કમા દુસુ વિ અરઇક્કં.૯૧
 પુવ્વુત્તપલ્લિ-સમસય, અણુગહણાનિટ્ઠિએ હવઇ પલિઓ;
 દસ કોડિકોડિપલિએહિં, સાગરો હોઇ કાલસ્સ. ૯૨
 સાગરચઉતિદુકોડા-કોડિમિએ અરતિગે નરાણ કમા;
 આઊ તિ દુ ઇગપલિઆ, તિદુઇગકોસા તણુચ્ચત્તં.૯૩
 તિદુઇગાદિણોહિં તૂવરિ-બયરામલમિત્તુ તેસિમાહારો;
 પિટ્ટઇકરંડા દોસય, ઇપ્પન્ના તદ્દલં ચ દલં. ૯૪
 ગુણવન્નદિણો તહ પનર-પનરઅહિએ અવચ્ચપાલણયા;
 અવિ સયલજિઆ જુઅલા, સુમણ સુરૂવા ય સુરગઇઆ. ૯૫
 તેસિ મત્તંગ ભિંગા તુરિઅંગા જોઇ દીવ ચિત્તંગા;
 ચિત્તરસા મણિઅંગા, ગેહાગારા અણિઅયકખા. ૯૬
 પાણં ભાયણ પિચ્છણ, રવિપહ દીવપહ કુસુમ માહારો;
 ભૂસણ ગિહ વત્થાસણ, કપ્પદુમા દસવિહા દિંતિ.૯૭
 મણુઆઉસમગયાઇ, હયાઇ-ચઉરંસ જાઈ-અટ્ટંસા;
 ગોમહિસુટ્ટખરાઇ-પણંસ સાણાઇ-દસમંસા. ૯૮
 ઇચ્ચાઇ તિરચ્છાણ વિ, પાયં સવ્વારએસુ સારિચ્છં;
 તઈઆરસેસિ કુલગર-નયજિણધમ્માઇ ઉપ્પત્તી. ૯૯
 કાલદુગે તિચઉત્થારગેસુ એગૂણનવઇપકખેસુ;
 સેસિ ગએસુ સિજ્જંતિ, હુંતિ પઢમંતિમજિણિદ્દા.૧૦૦
 બાયાલસહસવરસુ-ણિગકોડાકોડિ અયરમાણાએ;
 તુરિએ નરાઉ પુવ્વાણ, કોડિ તણુ કોસચઉરંસં. ૧૦૧
 વરિસેગવીસસહસ, પ્પમાણપંચમરએ સગકરુચ્ચા;
 તીસહિઅસયાઉ નરા, તયંતિ ધમ્માઇઆણંતો. ૧૦૨
 ખારગ્ગિવિસાઇહિં, હાહાભૂઆકયાઇ પુહવીએ;
 ખગબીયં વિઅડ્ઢાઇસુ, નરાઇબીયં બિલાઇસુ. ૧૦૩
 બહુમચ્છચક્કવહનઇ-ચઉક્કપાસેસુ નવ નવ બિલાઇં;
 વેઅડ્ઢોભયપાસે, ચઉઆલસયં બિલાણેવં. ૧૦૪
 પંચમસમઇટ્ટઠારે, દુકરુચ્ચા વીસવરિસઆઉ નરા;
 મચ્છાસિણો કુરૂવા, કૂરા બિલવાસિ કુગઇગમા.૧૦૫
 નિલ્લજ્જા નિવ્વસણા, ખરવયણા પિઅસુઆઇઠિઇરહિઆ;
 થીઓ ઇવરિસગબ્ભા, અઇદુહપસવા, બહુસુઆય.૧૦૬
 ઇઅ અરઇકકેણવસપ્પિણિ ત્તિ ઉસપ્પિણી વિ વિવરીઆ;

વીસં સાગર કોડાકોડીઓ કાલચક્કમ્મિ. ૧૦૭
 કુરુદુગિ હરિરમ્મયદુગિ, હેમવએરણ્ણવઇદુગિ વિદેહે;
 કમસો સયાવસપ્પિણિ, અરયચઉક્કાઇસમકાલો.૧૦૮
 હેમવએરણ્ણવએ, હરિવાસે રમ્મએ અ રયણમયા;
 સદાવઇવિઅડાવઇ, ગંધાવઇ માલવંતકપ્પા. ૧૦૯
 ચઉ વટ્ટવિઅડ્ઢાસાઇ, અરુણપઉમપ્પભાસ સૂરવાસા;
 મૂલુવરિ પિહુત્તે તહ, ઉચ્ચત્તે જોયણસહસ્સં. ૧૧૦
 મેરૂ વટ્ટો સહસ્સકંદો લકખૂસિઓ સહસ્સુવરિં;
 દસગુણ ભુવિ તં સનવઇ, દસિગારંસં પિહુલમૂલે.૧૧૧
 પુઢવુવલવયરસક્કર, મયકંદો ઉવરિ જાવ સોમણસં;
 ફલિહંકરયચકંચણ-મઓ અ જંબૂણઓ સેસો. ૧૧૨
 તદુવરિ ચાલીસુચ્ચા, વટ્ટા મૂલુવરિ બાર ચઉ પિહુલા;
 વેરુલિયા વરચૂલા, સિરિભવણ-પમાણ ચેઇહરા.૧૧૩
 ચૂલાતલાઉ ચઉસય, ચઉનવઇ વલયરૂવવિકખંભં;
 બહુજલકુંડં પંડગ-વણં ચ સિહરે સવેઇઅં. ૧૧૪
 પન્નાસજો અણોહિં, ચૂલાઓ, ચઉદ્ધિસાસુ જિણભવણા;
 સવિદ્ધિસિ સક્કીસાણં, ચઉવાવિજુઆ ચ પાસાયા.૧૧૫
 કુલગિરિચેઇહરાણં, પાસાયાણં ચિમે સમટ્ઠગુણા;
 પણવીસ રુદં દુગુણા-યામાઉ ઇમાઉ વાવીઓ. ૧૧૬
 જિણહરબહિદ્ધિસિ જોઅણ-પણસય દીહદ્ધપિહુલ ચઉઉચ્ચા;
 અદ્ધસસિસમા ચઉરો, સિઅકણાયસિલા સવેઇઆ.૧૧૭
 સિલમાણટ્ઠસહસ્સં-સમાણસીહાસણોહિ દોહિ જુઆ;
 સિલ પંડુકંબલા રત્ત-કંબલા પુવ્વપચ્છિમઓ. ૧૧૮
 જામુત્તરાઉ તાઓ, ઇગેગસીહાસણાઉ અઇપુવ્વા;
 ચઉસુ વિ તાસુ નિયાસણ દ્ધિસિભવજિણમજ્જણંહોઇ.
 સિહરા ઇત્તીસેહિં સહસેહિં મેહલાઇ પંચસએ;
 પિહુલં સોમણસવણં, સિલવિણુ પંડગવણસરિચ્છં.૧૨૦
 તબ્બાહિરિ વિકખંભો, બાયાલસયાઇં દુસયરિ જુઆઇં;
 અટ્ટેગારસભાગા, મજ્જે તં ચેવ સહસૂણં. ૧૨૧
 તત્તો સડ્ઢદુસટ્ઠી-સહસેહિં નંદણં પિ તહ ચેવ;
 નવરિ ભવણપાસાય-તરટ્ઠ દ્ધિસિ કુમરિકૂડા વિ.૧૨૨
 નવસહસ નવસયાઇં ચઉપન્ના ઇચ્ચિગારભાગા ય;
 નંદણબહિવિકખંભો, સહસૂણો હોઇ મજ્જમ્મિ.૧૨૩
 તદ્દહો પંચસએહિં, મહિઅલિ તહ ચેવ ભદ્ધસાલવણં;
 નવરમિહ દ્ધિગય ચ્ચિઅ, કૂડા વણવિત્થરં તુ ઇમં.૧૨૪
 બાવીસસહસ્સાઇં, મેરૂઓ પુવ્વઓ અ પચ્છિમઓ;
 તં ચાડસીવિહત્તં, વણમાણં દાહિણુત્તરઓ. ૧૨૫
 ઇવ્વીસ સહસ ચઉસય, પણહત્તરિ ગંતુ કુરુનઇપવાયા;
 ઉભઓ વિણિગ્ગયા ગય-દંતા મેરુમ્મુહા ચઉરો.૧૨૬
 અગ્ગેઆઇસુ પયાહિણેણ, સિઅરત્તપીઅનીલાભા;
 સોમણસ વિજ્જુપ્પહ, ગંધમાયણમાલવંતકપ્પા. ૧૨૭
 અહલોયવાસિણીઓ, દ્ધિસાકુમારીઉ અટ્ઠ એએસિં;
 ગયદંતગિરિવરાણં, હિટ્ઠા ચિટ્ઠંતિ ભવણેસુ. ૧૨૮

ધુરિ અંતે ચઉપણસય, ઉચ્ચત્તિ પિહુત્તિ પણસયાડસિસમા;
 દીહત્તિ ઇમે છકલા, દુસય નવુત્તર સહસતીસં. ૧૨૯
 તાણંતો દેવુત્તર-કુરાઉ ચંદ્રસંઠિયાઉ દુવે;
 દસસહસ વિસુદ્ધમહા-વિદેહ દલમાણ પિહુલાઓ. ૧૩૦
 નઇપુવ્વાવરકૂલે, કણગમયા બલસમા ગિરિ દો દો;
 ઉત્તરકુરાઇ જમગા, વિચિત્તચિત્તા ય ઇઅરીએ. ૧૩૧
 નઇવહદીહા પણ પણ, હરયા દુદુદારયા ઇમે કમસો;
 નિસહો તહ દેવકુરૂ, સૂરો સુલસો ય વિજજુપભો. ૧૩૨
 તહ નીલવંત ઉત્તરકુરૂ ચંદેરવય માલવંતુ ત્તિ;
 પઉમદહસમા નવરં, એએસુ સુરા દહસનામા. ૧૩૩
 અડસય ચઉતીસ જોઅણાઇં, તહ સેગસત્તભાગાઓ;
 ઇક્કારસ ય કલાઓ, ગિરિ-જમલ-દહાણ-મંતરયં. ૧૩૪
 દહ-પુવ્વાવરદસજોયણેહિ, દસ દસ વિઅડ્ઢકૂડાણં;
 સોલસગુણાપ્પમાણા, કંચણગિરિણો દુસય સવ્વે. ૧૩૫
 ઉત્તરકુરુપુવ્વદ્દે, જંબૂણાય જંબુપીઠમંતેસુ;
 કોસદુગુચ્ચં કમિ વડ્ઢમાણુ, ચઉવીસગુણં મજ્જે. ૧૩૬
 પણસયવટ્ટપિહુત્તં, તં પરિખિત્તં ય પઉમવેઇએ;
 ગાઉદુગુચ્ચ-દ્ધપિહુત્ત, ચારુ-ચઉદાર-કલિઆએ. ૧૩૭
 તં મજ્જે અડવિત્થર, ચઉચ્ચ મણિ પીઠિઆઇ જંબૂતરૂ;
 મૂલે કંઠે ખંધે, વરવયરા-રિટ્ઠ-વેરુલિએ. ૧૩૮
 તસ્સ ય સાહપસાહા, દલા ય બિંટાય પલ્લવા કમસો;
 સોવન્ન-જાયરૂવા, વેરુલિ-તવણિજજ-જંબુણયા. ૧૩૯
 સો રયયમયપવાલો, રાયયવિડિમોય રયણપુફ્ફલો;
 કોસદુગં ઉવ્વેહે, થુડસાહાવિડિમવિકખંભો. ૧૪૦
 થુડ સાહવિડિમદીહ ત્તિ, ગાઉએ અટ્ઠ પનર ચઉવીસં;
 સાહા સિરિસમભવણા, તમ્માણ સચેઇઅં વિડિમં. ૧૪૧
 પુવિલ્લ સિજજ તિસુ આસણાણિ, ભવણેસુડણાઢિઅસુરસ્સ;
 સા જંબૂ બારસ-વેઇઆહિં કમસો પરિક્ખિત્તા. ૧૪૨
 દહપઉમાણં જં વિત્થરં, તુ તમિહાવિ જંબુરુકખાણં;
 નવરં મહયરિયાણં, ઠાણે ઇહ અગ્ગમહિસીઓ. ૧૪૩
 કોસદુસએહિં જંબૂ, ચઉદિસિં પુવ્વસાલસમભવણા;
 વિદિસાસુ સેસતિસમા, ચઉવાવિજુયા ય પાસાયા. ૧૪૪
 તાણંતરેસુ અડ જિણ-કુડા તહ સુરકુરાઇ અવરદ્દે;
 રાયયપીઠે સામલિ-રુકખો એમેવ ગરુલસ્સ. ૧૪૫
 બત્તીસ સોલ બારસ, વિજયા વકખાર અંતરનઇઓ;
 મેરુવણાઓ પુવ્વાવરાસુ કુલગિરિ-મહનયંતા. ૧૪૬
 વિજયાણ પિહુત્તિ સગટ્ઠ-ભાગ બારુત્તરા દુવીસસયા;
 સેલાણં પંચસએ, સવેઇ-નઇ પન્નવીસ-સયં. ૧૪૭
 સોલસસહસ્સ પણસય, બાણઉઆ તહ ય દો કલાઓ ય;
 એએસિં સવ્વેસિં, આયામો વણમુહાણં ય. ૧૪૮
 ગયદંતગિરિવ્વુચ્ચા, વકખારા તાણમંતરનઇણં;
 વિજયાણં ય ભિહાણાઇં, માલવંતા પયાહિણઓ. ૧૪૯
 ચિત્તે ય બંભકૂડે, નલિણીકૂડે ય એગસેલે ય;

તિઉડે વેસમણે વિ ય, અંજણ માયંજણે ચેવ. ૧૫૦
 અંકાવઘ પમ્હાવઘ, આસીવિસ તહ સુહાવહે ચંદે;
 સૂરે નાગે દેવે, સોલસ વકખારગિરિનામા. ૧૫૧
 ગાહાવાઈ દહવઈ, વેગવઈ તત્ત મત્ત ઉમ્મત્તા;
 ખીરોય સીયસોયા, તહ અંતોવાહિણી ચેવ. ૧૫૨
 ઉમ્મીમાલિણિ ગંભીર-માલિણી ફેણમાલિણી ચેવ;
 સવ્વત્થ વિ દસજોયણ, ઉંડા કુંડુભ્મવા એયા. ૧૫૩
 કચ્છુ સુકચ્છો ય મહા-કચ્છો કચ્છાવઈ તહા;
 આવત્તો મંગલાવત્તો, પુકખલો પુકખલાવઈ. ૧૫૪
 વચ્છુ સુવચ્છો ય મહા-વચ્છો વચ્છાવઈ વિ ય;
 રમ્મો ય રમ્મઓ ચેવ, રમણી મંગલાવઈ. ૧૫૫
 પમ્હુ સુપમ્હો ય મહા-પમ્હો પમ્હાવઈ તઓ;
 સંખો નલિણનામા ય, કુમુઓ નલિણાવઈ. ૧૫૬
 વપ્પુ સુવપ્પો અ મહા-વપ્પો વપ્પાવઈ ત્તિ ય;
 વગ્ગુ તહા સુવગ્ગુ ય, ગંધિલો ગંધિલાવઈ. ૧૫૭
 એએ પુવ્વાવરગય વિઅડ્ઢદલિય ત્તિ નઈદિ સિદ્ધલેસુ;
 ભરહદ્ધપુરિસમાઓ, ઇમેહિ નામેહિ નયરીઓ. ૧૫૮
 ખેમા ખેમપુરા વિ અ, અરિહ્ઠ રિટ્ઠાવઈ ય નાયવ્વા;
 ખગ્ગી મંજૂસા વિ ય, ઓસહિપુરી પુંડરિગિણી ય. ૧૫૯
 સુસીમા કુંડલા ચેવ, અવરાઈઅ પહંકરા;
 અંકાવઘ પમ્હાવઘ, સુભા રયણસંચયા. ૧૬૦
 આસપુરા સીહપુરા, મહાપુરા ચેવ હવઈ વિજયપુરા;
 અવરાઈયા ય અવરા, અસોગા તહ વીઅસોગા ય. ૧૬૧
 વિજયા ય વેજયંતી, જયંતિ અપરાજિયા ય બોધવ્વા;
 ચક્કપુરા ખગ્ગપુરા, હોઇ અવજ્જા અઉજ્જા ય. ૧૬૨
 કુંડુભ્મવા ઉ ગંગા-સિંધૂઓ કચ્છ પમ્હપમુહેસુ;
 અટ્ઠટ્ઠસુ વિજએસું, સેસેસુ ય રત્ત રત્તવઈ. ૧૬૩
 અવિવકિખિણ જગઈ, સવેઈ વણમુહયઉક્ક પિહુલત્તં;
 ગુણતીસસય દુવીસા, નઈંતિ ગિરિઅંતિ એગકલા. ૧૬૪
 પણતીસસહસયઉસય, ઇડુત્તરા સયલવિજયવિકખંભો;
 વણમુહદુગ વિકખંભો, અડવન્ન સયા ય ચોયાલા. ૧૬૫
 સગ સય પન્નાસા નઈ-પિહુત્તિ યઉવન્ન સહસ મેરુવણે;
 ગિરિવિત્થરિયઉસહસા, સવ્વસમાસો હવઈ લકખં. ૧૬૬
 જોઅણ-સયદસગંતે, સમધરણીઓ અહો અહોગામા;
 બાયાલીસસહસેહિં, ગંતું મેરુસ્સ પચ્છિમઓ. ૧૬૭
 ચઉયઉત્તિસં ય જિણા, જહન્નમુક્કોસઓ અ હુંતિ કમા;
 હરિયકિંકબલા ચઉરો, તીસં પત્તેઅમિહ દીવે. ૧૬૮
 સસિદ્ધુગરવિદ્ધુગ ચારો, ઇહ દીવે તેસિં ચારખિત્તં તું;
 પણસય દસુત્તરાઈ, ઇગસટ્ઠિભાગા ય અડયાલા. ૧૬૯
 પનરસ ચુલસીઈસયં ઇપ્પન્નડડયાલભાગમાણાઈ;
 સસિસૂરમંડલાઈ, તયંતરાણિગિગહીણાઈ. ૧૭૦
 પણતીસ જોઅણે ભાગ-તીસ ચઉરો અ ભાગ સગભાયા;
 અંતરમાણં સસિણો, રવિણો પુણ જોઅણે દુન્નિ. ૧૭૧

University.org

भवतु

દીવંતો અસિઅસએ, પણ પણસટ્ટી અ મંડલા તેસિં;
 તીસહિઅ તિસય લવણે, દસિગુણવીસં સયં કમસો.૧૭૨
 સસિસસિરવિરવિ અંતરિ, મજ્જે ઇગલકખુ તિસય સાદૂણો;
 સાહિઅદુસયરિ પણ ચય, બહિલકખો ઇસય સાઠહિઓ.
 સાહિઅ પણસહસ તિહુત્તરાઇં સસિણો મુહુત્તગઇ મજ્જે;
 બાવન્નહિઆ સા બાહિ, પઇમંડલ પઉણચઉવુડ્ડી.૧૭૪
 જા સસિણો સા રવિણો, અડસયરિસએણ સીસએણ હિઆ;
 કિંચૂણાણં અટ્ટાર સટ્ટિઠભાગાણ મિહ વુડ્ડી. ૧૭૫
 મજ્જે ઉદયત્થંતરિ, ચઉનવઇ સહસ્સ પણસય ઇવીસા;
 બાયાલ સટ્ટિઠભાગા, દિણં ચ અટ્ટારસમુહુત્તં. ૧૭૬
 પઇમંડલ દિણહાણી, દુણહ મુહત્તેગસટ્ટિઠભાગાણં;
 અંતે બારમુહુત્તં, દિણં નિસા તસ્સ વિવરીઆ. ૧૭૭
 ઉદયત્થંતરિ બાહિં, સહસા તેસટ્ટિઠ ઇસય તેસટ્ટઠા;
 તહ ઇગસસિપરિવારે, રિકખડવીસા-ડસીઇ ગહા. ૧૭૮
 ઇસટ્ટિઠ સહસ નવસય, પણહત્તરિ તારકોડિકોડીણં;
 સન્તંતરેણમુસેહં, ગુલમાણેણ વા હુતિ. ૧૭૯
 ગહ રિકખ તારગાણં, સંખં સસિસંખ સંગુણં કાઉં;
 ઇચ્છિયદીવુદ્દહિંમિ ચ, ગહાઇમાણં વિઆણેહ. ૧૮૦
 ચઉ ચઉ બારસ બારસ, લવણે તહ ધાયઇમ્મિ સસિસૂરા;
 પરઓ દહિદીવેસુ અ, તિગુણા પુવ્વિલ્લસંજુત્તા. ૧૮૧
 નરખિત્તં જા સમસેણિ, ચારિણો સિગ્ધ સિગ્ધતર ગઇણો;
 દિટ્ટિપહમિંતિ ખિત્તા ણુમાણઓ તે નરાણેવં. ૧૮૨
 પણસય સત્તતીસા, ચઉતીસસહસ્સ લકખઇગવીસા;
 પુકખરદીવડ્ડનરા, પુવ્વેણ અવરેણ પિચ્છંતિ. ૧૮૩
 નરખિત્તબહિં સસિરવિ-સંખા કરણંતરેહિં વા હોઇ;
 તહ તથ ચ જોઇસિયા, અચલદ્ધપમાણસુવિમાણા. ૧૮૪
 જંબૂ પરિહિ તિલકખા, સોલસહસ દુસય પઉણઅડવીસા;
 ઘણુ અડવીસસયંગુલ, તેરસસડ્ડા સમહિઆ ચ. ૧૮૫
 સગસય નઉઆકોડી, લકખા ઇપ્પન્ન ચઉનવઇ સહસા;
 સડ્ડસયં પઉણદુકોસ, સડ્ડબાસટ્ટિઠકર ગણિઅં. ૧૮૬
 વટ્ટપરિહિં ચ ગણિઅં, અંતિમખંડાઇ ઉસુજિઅં ચ ઘણું;
 બાહું પયરં ચ ઘણં, ગણેહ એએહિં કરણેહિં. ૧૮૭
 વિકખંભવગ્ગદહગુણ-મૂલં વટ્ટસ્સ પરિરઓ હોઇ;
 વિકખંભપાયગુણિઓ, પરિરઓ તસ્સ ગણિઅપયં. ૧૮૮
 ઓગાહુ ઉસૂ સુચ્ચિઅ, ગુણવીસગુણો કલાઉસૂ હોઇ;
 વિઉસુપિહુત્તે-ચઉગુણ-ઉસુગુણિએ મૂલમિહ જીવા. ૧૮૯
 ઇસુવગ્ગિ ઇગુણિ જીવા-વગ્ગજુએ મૂલ હોઇ ઘણુપિટ્ઠં;
 ઘણુદુગ-વિસેસ-સેસં, દલિઅં બાહાદુગં હોઇ. ૧૯૦
 અંતિમખંડસ્સિગુણા, જીવં સંગુણિઅ ચઉહિં ભઈઊણં;
 લદ્ધંમિ વગ્ગિએ દસ-ગુણમ્મિ મૂલં હવઇ પયરો. ૧૯૧
 જીવા-વગ્ગાણ દુગે, મિલિએ દલિએ અ હોઇ જં મૂલં;
 વેઅડ્ડાઈણ તયં, સપિહુત્તગુણં ભવે પયરો. ૧૯૨
 એયં ચ પયરગણિઅં, સંવવહારેણ દંસિઅં તેણં;

કિંચૂણં હોઇ ફલં, અહિઅં પિ હવઇ સુહુમગણા.૧૮૩
 પયરો સોસ્સેહ-ગુણો, હોઇ ઘણો પરિરયાઇ સવ્વં વા;
 કરણગણાલસેહિં, જંતગલિહિઆઉ દટ્ઠવ્વં. ૧૮૪
 ગોતિત્થં લવણોભય, જોઅણ પણનવઇસહસ જા તત્થ;
 સમભૂતલાઉ સગસય જલવુડ્ઢી સહસમોગાહો.૧૮૫
 તેરાસિએણ મજ્જિલ્લ-રાસિણા સંગુણિજજ અંતિમગં;
 તં પઢમરાસિભઇઅં, ઉવ્વેહં મુણસુ લવણજલે. ૧૮૬
 હિટ્ઠુવરિ સહસદસગં, પિહુલા મૂલાઉ સતર-સહસુચ્ચા;
 લવણસિહા સા તદ્દુવરિ, ગાઉદ્દુગં વડ્ઢઇ દુવેલં.૧૮૭
 બહુમજ્જે ચઉદ્ધિસિ ચઉ, પાયાલા વયરકલસસંઠાણા;
 જોઅણસહસ્સ જડા, તદ્દસ-ગુણ હિટ્ઠુવરિ રુંદા.૧૮૮
 લક્ખં ચ મજ્જિ પિહુલા, જોઅણલક્ખં ચ ભૂમિમોગાઢા;
 પુવ્વાઇસુ વડવામુહ-કજુવ જૂવેસર-ભિહાણા. ૧૮૯
 અન્ને લહુપાયાલા, સગ સહસા અડસયા સચુલસીઆ;
 પુવ્વુત્ત-સયંસ-પમાણા, તત્થ તત્થ પ્પએસેસુ. ૨૦૦
 કાલો અ મહાકાલો, વેલંબ પભંજણે અ ચઉસુ સુરા;
 પલિઓવમાઉણો તહ, સેસેસુ સુરા તયદ્ધાગિ. ૨૦૧
 સવ્વેસિમહોભાગે, વાગિ મજ્જિલ્લયમ્મિ જલવાગિ;
 કેવલ-જલમુવરિલ્લે, ભાગદ્દુગે તત્થ સાસુવ્વ. ૨૦૨
 બહવે ઉદારવાયા, મુચ્છંતિ ખુહંતિ દુન્નિવારાઓ;
 એગ-અહોરતંતો, તયા તયા વેલપરિવુડ્ઢી. ૨૦૩
 બાયાલ સદિઠ-દુસયરિ, સહસા નાગાણ મજ્જુવરિ બાહિં;
 વેલં ધરંતિ કમસો, ચઉહત્તરુલક્ખુ તે સવ્વે. ૨૦૪
 બાયાલ સહસ્સેહિં, પુવ્વેસાણાઇ-દિસિવિદિસિ લવણે;
 વેલંધરાણુવેલં ધરરાઈણં ગિરિસુ વાસા. ૨૦૫
 ગોથૂભે દગભાસે, સંખે દગસીમ નામિ દિસિ સેલે;
 ગોથૂભો સિવદેવો, સંખો અ મણોસિલો રાયા. ૨૦૬
 કક્કોડે વિજ્જુપભે, કેલાસ રુણપ્પહે વિદિસિ સેલે;
 કક્કોડગુ કદ્દમઓ, કેલાસ રુણપ્પહો સામી. ૨૦૭
 એએ ગિરિણો સવ્વે, બાવીસ-હિઆ ય દસસયા મૂલે;
 ચઉસય ચઉવીસહિઆ, વિચ્છિન્ના હુંતિ સિહરતલે.૨૦૮
 સતરસસય ઇગવીસા, ઉચ્ચત્તે તે સવેઇઆ સવ્વે;
 કણગંક રયય ફાલિહ, દિસાસુ વિદિસાસુ રયણમયા.૨૦૯
 ઇવ ગુણહત્તરિજોઅણ, બહિજલુવરિચત્ત પણ નવઇ ભાયા;
 એએ મજ્જે નવસય, તેસટ્ઠા ભાગ સગસયરિ.૨૧૦
 હિમવંતંતા વિદિસી સાણાઇગયાસુ ચઉસુ દાઢાસુ;
 સગ સગ અંતરદીવા, પઢમચઉક્કં ચ જગઇઓ.૨૧૧
 જોઅણતિસએહિં તઓ, સયસયવુડ્ઢી અ ઇસુ ચઉક્કેસુ;
 અન્નુજગઇઅંતરિ, અંતરસમવિત્થરા સવ્વે. ૨૧૨
 પઢમચઉક્કુચ્ચ બહિં, અડ્ઢાઇઅજોઅણે અ વીસંસા;
 સયરિંસ વુડ્ઢિપરઓ, મજ્જદિસિં સવ્વિ કોસદ્દુગં.૨૧૩
 સવ્વે સવેઇઅંતા, પઢમ-ચઉક્કમ્મિ તેસિ નામાઇં;
 એગોરુઅ આભાસિઅ, વેસાણિઅ ચેવ લંગૂલે. ૨૧૪

city.org

ભવતુ

બીઅચઉક્કે હયગય, ગોસક્કુવિપુવ્વ કણ્ણનામાણો;
 આયંસ મિંઢગ અઓ-ગોપુવ્વમુહા ય તઇઅમ્મિ.૨૧૫
 હય ગય હરિ વગ્ઘ મુહા, ચઉત્થએ આસકણ્ણુ હરિકણ્ણો;
 અકણ્ણ કણ્ણ પાવરણુ, દીઓ પંચમચઉક્કમ્મિ.૨૧૬
 ઉક્કમુહો મેહમુહો, વિજ્જુમુહો વિજ્જુદંત છટ્ઠમ્મિ;
 સત્તમગે દંતંતા, ઘણ-લટ્ઠ-નિગૂઢ-સુદ્ધા ય. ૨૧૭
 એમેવ ય સિહરિમ્મિ વિ, અડવીસં સવ્વિ હુંતિ છપ્પન્ના;
 એએસુ જુઅલરૂવા, પલિઆ સંખંસ-આઉ નરા.૨૧૮
 જોઅણ દસમંસત્તણૂ, પિટ્ઠિઠ કરંડાણ મેસિ ચઉસટ્ઠી;
 અસણં ય ચઉત્થાઓ ગુણસીદ્ધિણ વચ્ચ પાલણયા.૨૧૯
 પચ્છિમદ્ધિસિ સુત્થિઅ, લવણસામિણો ગોઅમુત્તિઈગુદ્ધીવો;
 ઉભઓ વિ જંબુલાવણ, દુ દુ રવિ દીવા ય તેસિં ય.૨૨૦
 જગઇપરુપ્પરઅંતરિ, તહ વિત્થર બાર જોઅણ સહસ્સા;
 એમેવ ય પુવ્વદ્ધિસિં, ચંદ્દચઉક્કસ્સ ચઉ દીવા. ૨૨૧
 એવં ચિઅ બાહિરઓ, દીવા અટ્ઠટ્ઠપુવ્વપચ્છિમઓ;
 દુ દુ લવણ છ છ ધાયઇ સંડ સસીણં રવીણં ય.૨૨૨
 એએ દીવા જલુવરિ, બહિ જોઅણ સડ્ઢઅટ્ઠસીઇ તહા;
 ભાગા વિ અ ચાલીસા, મજ્જે પુણ કોસદ્ધુગમેવ.૨૨૩
 કુલગિરિપાસાયસમા, પાસાયા એસુ ણિઅણિઅપહૂણં;
 તહ લાવણ-જોઇસિઆ, દગ્ગાલિહ ઉડ્ઢલેસાગા.૨૨૪
 જામુત્તરદીહેણં દસસય-સમ-પિહુલ પણસયુચ્ચેણં;
 ઉસુયાર ગિરિદ્ધુગેણં, ધાયઇસંડો દુહવિહત્તો. ૨૨૫
 ખંડદુગે છ છ ગિરિણો, સગ સગ વાસા ય અરવિવરરૂવા;
 ધુરિ અંતિ સમા ગિરિણો, વાસા પુણ પિહુલપિહુલયરા. ૨૨૬
 દહકુંડુંડુત્તમમે રુમુસ્સયં વિત્થરં વિઅડ્ઢાણં;
 વટ્ઠિગિરીણં ય સુમેરુવજ્જમિહ જાણ પુવ્વસમં. ૨૨૭
 મેરુદ્ધુગં પિ તહ ચ્ચિઅ, નવરં સોમણસ હિટ્ઠવરિ-દેસે;
 સગ-અડ-સહસ ઊણુ ત્તિ, સહસપણસીઇ ઉચ્ચત્તે.૨૨૮
 તહ પણનવઇ ચઉણઉઅ, અદ્ધચઉણઉઅ અટ્ઠતીસા ય;
 દસ સયાઇ કમેણં, પણઠાણ પિહુત્તિ હિટ્ઠાઓ.૨૨૯
 ણઇકુંડદીવવણમુહ, દહ-દીહરસેલ-કમલવિત્થારં;
 ણઇઉડતં ય તહા, દહ-દીહતં ય ઇહ દુગુણં. ૨૩૦
 ઇગલકખુ સત્તસહસા, અડસય ગુણસીઇ ભદ્દસાલવણં;
 પુવ્વાવરદીહં તં, જામુત્તર અટ્ઠસી ભઇઅં. ૨૩૧
 બહિ ગયદંતા દીહા, પણ લકખૂણસયરિસહસ દુગુણટ્ઠા;
 ઇઅરે તિલકખ છપ્પન્ન, સહસ્સ સય દુન્નિ સગવીસા.૨૩૨
 ખિત્તાણુમાણઓ સેસ, સેલ-નઇ-વિજય-વણમુહાયામો;
 ચઉલકખ-દીહ વાસા, વાસ વિજય-વિત્થરો ઉ ઇમો.૨૩૩
 ખિત્તંક-ગુણ-ધુવંકે, દો સય બારુત્તરેહિ પવિભત્તે;
 સવ્વત્થ વાસવાસો, હવેઇ ઇહ પુણ ઇય ધુવંકા.૨૩૪
 ધુરિ ચઉદ લકખ દુસહસ, દોસગણઉઆ ધુવં તહા મજ્જે;
 દુસય અડુત્તર સત્ત-સટ્ઠિઠ સહસ છવ્વીસ લકખા ય.૨૩૫
 ગુણવીસ સયં બત્તીસ, સહસ ગુણયાલ લકખ ધુવમંતે;

નઈગિરિવશમાણવિસુદ્ધ, ખિત્તસોલંસપિહુ વિજયા.૨૩૭
 નવસહસા છસય તિઉ-તરા ય છચ્ચેવ સોલભાયા ય;
 વિજયપિહુત્તં નઈગિરિ, વણવિજયસમાસિ ચઉલકખા.
 પુવ્વં વ પુરી અ તરુ, પરમુત્તરકુરૂસુ ધાઈ મહધાઈ;
 રુકખા તેસુ સુદંસણ-પિયદંસણનામયા દેવા. ૨૩૮
 ધુવરાસીસુ અ મિલિઆ, એગો લકખો ય અડસયરિ સહસા;
 અટૂઠ સયા બાયાલા, પરિહિતિગં ધાયઈસંડે. ૨૩૯
 કાલોઓ સવ્વત્થ વિ, સહસુંડો વેલવિરહિઓ તત્થ;
 સુત્થિઅસમ કાલ મહા-કાલ સુરા પુવ્વ પચ્છિમઓ.૨૪૦
 લવણમ્મિ વ જહસંભવ, સસિરવિદીવા ઇહં પિ નાયવ્વા;
 નવરં સમંતઓ તે, કોસદુગુચ્ચા જલસ્સુવરિં. ૨૪૧
 પુકખરદલબહિજગઇવ્વ, સંઠિઓ માણુસુત્તરો સેલો;
 વેલંઘરગિરિમાણો, સીહનિસાઇ નિસઢવત્તો. ૨૪૨
 જહ ખિત્તનગાઈણં, સંઠાણો ધાઇએ તહેવ ઇહં;
 દુગુણો અ ભદ્દસાલો, મેરુસુયારા તહા ચેવ. ૨૪૩
 ઇહ બાહિરગયદંતા, ચઉરો દીહત્તિ વીસ-સયસહસા;
 તેઆલીસ સહસ્સા, ઉણવીસહિઆસયા દુન્નિ. ૨૪૪
 અબ્બિતરગયદંતા, સોલસલકખા ય સહસ છવ્વીસા;
 સોલહિઅં સયમેગં, દીહત્તે હુંતિ ચઉરો વિ. ૨૪૫
 સેસા પમાણઓ જહ, જંબૂદીવાઉ ધાઇએ ભણિઆ;
 દુગુણા સમા ય તે તહ, ધાયઇસંડાઉ ઇહ નેયા.૨૪૬
 અડસીલકખા ચઉદસ સહસા તહ નવસયા ય ઇગવીસા;
 અબ્બિતરધુવરાસી, પુવ્વુત્તવિહીઇ ગણિઅવ્વો. ૨૪૭
 ઇગ કોડિ તેરલકખા, સહસા ચઉચત્ત સગસય તિયાલા;
 પુકખવરદીવડ્ઢે, ધુવરાસી એસ મજ્જમ્મિ. ૨૪૮
 એગા કોડિ અડતીસ, લકખા ચઉહત્તરી સહસ્સા ય;
 પંચસયા પણસટ્ઠા, ધુવરાસી પુકખરદ્દંતે. ૨૪૯
 ગુણવીસસહસ સગસય, ચઉનઉઅ સવાય વિજયવિકખંભો;
 તહ ઇહ બહિવહસલિલા, પવિસંતિ અ નરનગસ્સાહો. ૨૫૦
 પુકખરદલપુવ્વાવર-ખંડંતો સહસદુગપિહુ દુ કુંડા;
 ભણિયા તટ્ઠાણં પુણ, બહુસ્સુયા ચેવ જાણંતિ. ૨૫૧
 ઇહ પઉમ મહાપઉમા, રુકખા ઉત્તરકુરૂસુ પુવ્વં વ;
 તેસુ વિ વસંતિ દેવા, પઉમો તહ પુંડરીઓ અ. ૨૫૨
 દોગુણહત્તરિ પઢમે, અડ લવણે બીઅદ્ધિવિ તઇઅદ્ધે;
 પિહુ પિહુ પણસયયાલા, ઇઅ નરખિત્તે સયલગિરિણો. ૨૫૩
 તેરહસય સગવત્ત્તા, તે પણમેરૂહિ વિરહિઆ સવ્વે;
 ઉસ્સેહપાયકંદા, માણુસસેલો વિએ મેવ. ૨૫૪
 ધુવરાસીસુ તિલકખા, પણપત્ત સહસ્સ છસય ચુલસીઆ;
 મિલિઆ હવંતિ કમસો, પરિહિતિગં પુકખરદ્દસ્સ. ૨૫૫
 નઇદહઘણથણિઆગણિ-જિણાઇણરજમ્મમરણકાલાઇ;
 પણયાલલકખજોઅણ-નરખિત્તં મુત્તુ નો પુરઓ. ૨૫૬
 ચઉસુ વિ ઉસુઆરેસું, ઇકકિકંકં નરનગમ્મિ ચત્તારિ;
 કૂડોવરિજિણાભવણા, કુલગિરિજણાભવણપરિમાણા. ૨૫૭

૨૩૭

૨૫૦

૨૫૩

તત્તો દુગુણપમાણા, ચઉદારા થુત્તવણિઅસરૂવે;
 નંદીસરિ બાવન્ના, ચઉ કુંડલિ રૂઅગિ ચત્તારિ. ૨૫૮
 બહુસંખવિગપ્પે રુઅગ-દીવિ ઉચ્ચત્તિ સહસ ચુલસીઇ;
 નરનગસમરુઅગો પુણ, વિત્થરિ સયઠાણિ સહસંકો.૨૫૯
 તસ્સ સિહરમ્મિ ચઉદ્ધિસિ, બીઅસહસ્સિગિગુ ચઉત્થિ અટ્ટઠટ્ટઠ;
 વિદ્ધિસિ ચઉ ઇઅ ચત્તા, દ્ધિસિકુમરી કૂડ સહસંકા.૨૬૦
 ઇઇ કઇવય દીવોદ્ધહિ વિઆરલેસો મએ વિમઇણાવિ;
 લિદ્ધિઓ જિણાગણહરગુરુ સુઅ સુઅદેવીપસાએણ.૨૬૧
 સેસાણ દીવાણ તહોદ્ધહીણં, વિઆરવિત્થારમણોરપારં;
 સયા સુઆઓ પરિભાવયંતુ, સવ્વં પિ સવ્વન્નુ મઇક્કચિત્તા. ૨૬૨
 સૂરીહિં જં રયણસેહરનામએહિં,
 અપ્પત્થમેવ રઇઅં નરખિત્તવિક્ખં;
 સંસોહિઅં પયરણં સુઅણોહિ લોએ,
 પાવેઉ તં કુસલરંગમઇં પસિદ્ધિં. ૨૬૩

૨૬૨

૨૬૩



સર્વ જ્ઞાનાય ભવતુ